



古今攷卷之二十六

鶴山魏了翁華甫撰

紫陽方回萬里續

上海後學王圻校刊

張蒼為計相

史記將相名臣年表高六年於相位書張蒼為計相索隱曰主天下書計及計吏東萊列傳書曰蒼以代相遷為計相一月更以列侯為主計四歲是時蕭何為相國而蒼乃自秦時為柱下御史明習天圖書計籍又善用筭律曆故令蒼以列侯居相府主郡國上計者師古曰專主計籍故號計相又曰去計相之名更號主計又曰柱下居殿柱之下若今侍立御史矣

紫陽方氏曰史記張丞相傳以六年中封為北平侯食邑二千戶遷為計相文穎曰能計故號計相計相之名初見於此後無其比以史文攷之為計相一月而改名主計索隱謂權特立號是也為主計凡四歲出為淮南王長相也以列侯居相府尊之故與蕭何等也

附論史記蕭曹五世家

紫陽方氏曰史記世家三十而蕭相國曹參留侯陳丞相絳侯周勃以漢初大功臣五人各居其一張丞相蒼雖壽考以功名終不與焉但為傳張耳陳餘魏豹彭越黥布淮陰侯韓信盧綰田儋樊鄴勝灌陸俱為傳或稱姓名或稱官或雙稱姓疎中有密孟堅漢書雖密而疎子長不為吳芮作傳然稱忠著令則書

之王陵周昌趙堯任敖申屠嘉並無傳朱建亦無豈心少之乎最後為傳寬斬欵周緤傳稱傳斬蒯成初謂蒯通細觀乃蒯成侯周緤取其篤厚忠直軍不利不利終無離上心蓋凶悍智詐如群反叛及蒯通之徒子長所不與也二十九卷劉敬叔孫通後皆文景時人矣漢書婁敬賜姓為劉不當仍書婁

附論史記外戚世家

紫陽方氏曰史記外戚世家索隱曰外戚紀后妃也后妃亦代有封爵故也漢書則編之列傳王隱則謂之紀而編諸列傳之首回於文選註中見有王隱漢書晁公武讀書志無之則亡矣東漢書范曄作皇后紀世人譏之蓋范曄又本於王隱耳回謂子長既作呂后本紀則外戚世家無可書者子長筆端竒逸其

序云自古受命帝王及繼體守文之君非特內德茂也蓋亦有
外戚之助焉此古文法也先引夏殷周三代興放殺禽之附本
次引易詩書春秋簡而不踈下文禮之用唯婚姻兢兢夫樂調
而四時和由禮入樂其說深妙乃後歸之於命其序妙甚至敘
高后事則大史公曰秦以前尚畧矣其詳靡得而記焉只此二句高甚
漢興呂娥姁為高祖正后男為太子只如此說將去妙漢書高后紀荀說曰諱雉師古曰
字娥姁史漢不書帝及后諱其注中及晚節色衰愛弛而戚夫人有寵其子如意
幾代太子者數矣及高祖崩呂后夷戚氏誅趙王如意而高祖
后宮唯獨無寵踈遠者得無恙呂氏長女為宣平侯張敖妻敖
女為孝惠皇后索隱曰皇甫謐云名媽呂太后以其重親故欲其生子萬
方終無子詐取後宮人子為子及孝惠帝崩天下初定未久繼

嗣不明於是貴外家王諸呂以為輔而以呂祿女為少帝后欲

連固根本牢甚然無益也高后崩合葬駟案關中記曰高祖陵在西呂后陵

在東帝后同塋則為合葬不合陵也諸陵皆如此祿產等懼誅作亂大臣征之天誘其

統一作卒滅呂氏唯獨置孝惠皇帝后居北宮迎立代王是為

孝文帝奉漢宗廟豈非天耶非天命孰能當之回謂此乃子長

自為一段議論若敘事則呂后紀盡之矣回嘗著咸德事畧書

咸淳德祐十二年事如史漢唐書紀之狀別為諸臣上及朱文

公呂成公張宣公二陸及欵為理廟十六相傳未完賈似道傳

三大冊三卷擬王莽或借紀若傳讀之謂敘事少自作文多非

史體然回讀太史書自作文議論其事者貫串紀傳中不可以

春秋之筆例之也左傳有君子曰公穀自為問答乃皆自為之

文附書諸此

附攷史記不得為無失二段

附論東萊大事記是處二段

紫陽方氏曰子長史記不得為無失其先黃老後六經進姦雄退慶士崇勢利羞貧賤孟堅譏之晁公武讀書志為釋其所以然貸子長之過而明其心可也回所見其失之大者書於此他別攷

陳涉不當為世家起閭左庶屯長王六月而為其御莊賈所殺漢書為傳世家雖子長自我作古以其有誅秦之功血食至子長之世然不足言也非公侯之比何必以世家尊之吳廣假王始見此韓信之所援也

項羽不當為本紀羽割天下分王違懷王之約衆心不服又弑義帝卒以此亡漢書同陳勝為傳是何以紀為

史記高祖本紀第八次項羽本紀之後高祖上不書漢字踈也呂后本紀第九無惠帝紀何也索隱曰呂太后本以女主臨朝自孝惠崩後立少帝而始稱帝正合附惠紀而論之不然或別為呂后本紀豈得令沒孝惠而獨稱呂后本紀合依班氏分為二紀焉回謂索隱說是也呂后紀中書孝惠元年十二月至七年秋八月崩九月辛丑葬乃後書太后稱制為六年至八年秋九月崩分為兩紀何不可無孝惠是無君也若少帝無其名合於高紀中書曰少帝元年呂太后稱制孟堅書惠帝皇后無子取后宮美人子名之以為太子子長全不書但曰太子即位為

帝而已豈非踈乎却於外戚世家呂娥姁事中書云呂太后詠取後宮人子為子嘗以馬班書味之後宮美人子亦惠帝庶子但非張皇后所生子耳立為少帝呂后廢之後群臣誅滅之第曰繼嗣不明亦何辜哉偶有感併書之

呂東萊大事紀書楚義帝元年冬十月劉邦至灞上秦王子嬰降是年秦二世三年之後歲在乙未史記漢書俱書漢元年惟東萊此書古今學者未之及也其實楚懷王遣沛公入關主從約沛公與項羽皆懷王之臣耳沛公十月先至灞上降秦嬰項羽後至十二月也使人還報懷王懷王曰如約謂先入關者王之之約也不以項羽強而撓焉可謂英主矣項羽然而陽尊為義帝又從而弑之然秦之亡實義帝主約東萊所書雖荀悅漢

紀溫公通鑑皆不及也

子長孟堅二紀皆於高帝至灞上之年書漢元年然未全有天下義帝已死劉項方爭丙申之歲東萊並書漢高皇帝二年以西楚霸王二年以至四年戊戌終明年已亥十月始書漢太祖高皇帝五年是年十二月項羽滅也去今已亥一千五百年矣方回書此心誠服呂成公之有識也

秋九月匈奴圍韓王信於馬邑信降匈奴

呂東萊書曰秋匈奴冒頓圍韓王信於馬邑九月信以馬邑降匈奴與匈奴南攻晉陽至大原解曰信雖失職守邊然舍晉陽內地之安而請治馬邑亦非偷惰者也高祖猜怒迫蹙之使其以國外叛為虜鄉導遂有平城之圍自是匈奴輕漢為世大患

閱百年而未息雖冒頓方興邊吏莫能枝梧苟非信啟其端寇賊亦未必如是之甚也然則人主心量不宏所繫豈少哉○紫陽方氏曰韓王信傳秋匈奴冒頓大入圍信信數使使求和解漢發兵救之疑信數間使有二心上賜信書責讓之曰專死不勇專生不仁寇攻馬邑君王力不足以堅守乎安危存亡之地此二者朕所以責望於君王回謂高帝猜怒迫蹙之者此書也信得書恐誅因與匈奴約共攻漢馬邑降之胡擊大原兵漢使在其間信之遣使奏而後遣可也然高祖猜疑奏亦不免於怒此二歲叛者三起滅荼也利幾也韓王信也實未反而被告者一遂執之韓信也

高帝七年冬平城白登之圍

在十月受朝之後聯書漢王信事不得不先

史記匈奴列傳漢書改一二字今書史記語於此匈奴得信因引兵南踰句注攻太原至晉陽城下高帝自將兵往擊之會冬大寒雨雪卒之墮指者十二三於是冒頓佯敗走誘漢兵漢兵逐擊冒頓冒頓匿其精兵見其羸弱於是漢悉兵多步兵二十二萬北逐之高帝先至平城步兵未盡到冒頓縱精兵四十萬騎圍高帝於白登七日漢兵中外不得相救餉匈奴騎其西方盡白馬東方盡青驢馬北方盡烏驢馬南方盡騂馬高帝則迺使使厚遺閼氏閼氏乃謂冒頓曰兩主不相角今得漢地而單于非終能居之也乃解圍之一角於是高帝令士皆持滿傳矢外鄉從解角直出與大軍合天下歌之曰平城之下亦誠苦七日不食不得穀弩

白登平城地名

史記匈奴傳平城徐廣曰在鴈門漢書韓王信傳上遂至平城上白登服虔曰臺名去平城七里如淳曰平城旁之高城若丘陵也師古曰在平城東山上去平城十餘里今其處猶存服說非也東萊曰平城漢晉屬鴈門郡後魏道武都平城置司州代尹孝文遷都洛陽改代尹曰萬年尹後周改曰雲中縣隋開皇初改曰雲內屬馬邑郡唐貞觀十四年以為雲州天寶元年改為雲中郡

平城陳平奇計

漢書陳平傳平從擊韓王信於代至平城為匈奴所圍七日不得食高帝用平奇計使單于闕氏解圍以得開高帝既出其計

秘世莫得聞又曰凡六出奇計○紫陽方氏曰史記陳丞相世家書之以護軍中尉從軍攻反者韓王信於代卒至平城此數語來歷分明卒至二字亦好圍以得開上無解字裴駟注按桓譚新論此策反薄陋拙惡故隱而不泄陳平往說闕氏闕氏言於單于而出之彼陳平必言漢有好麗美女為道其容貌天下無有今困急已遣使歸迎取欲進與單于單于見此人必大愛好之則闕氏日以踈遠不如及其未到令漢得脫去去亦不持女來矣闕氏婦女者妬妬之性必憎惡而爭去之此說簡而要劉子駿聞吾言乃稱善焉裴駟又謂漢書音義應劭說此事大指與栢論畧同不知是應全取栢論或別有所聞乎今觀栢論似本無說回讀常德府漢書云陳平秘計應劭白陳平使畫工

圖美女間遣人遺閼氏師古曰應氏之說出於桓譚新論以意測之非記傳所說也

附匈奴攷○匈奴名始見史記

紫陽方氏曰史記秦本紀秦孝公二十四年卒子惠文君駟立車裂商鞅十年張儀相秦十四年更名元年七年日十四年在位二韓趙魏燕齊帥匈奴去攻秦十年也韓趙魏燕齊帥匈奴去攻秦

匈奴名始見周慎靚王三年

東萊大事記書周慎靚王三年蘇秦約楚齊趙韓魏燕及匈奴伐秦楚懷王為從長攻函谷關秦出兵擊六國皆敗走解題曰匈奴之名始見於此合六國之衆又益以匈奴出師可謂盛矣賈生曰諸侯嘗以十倍之地百萬之衆仰關而攻秦秦人開關

延敵九國之師逡巡逃遁而不敢進蓋謂此也○紫陽方氏曰

周慎靚王定即位之年辛丑三年癸卯前乎此周威烈王甲午

二十三年戊寅入通鑑於是安王驕二十六年止乙巳烈王

喜七年止壬子顯王扁四十八年止庚子其二十三年乙酉孟

子見梁惠王其四十四年丙申諸侯畢王此數年九國伐秦去

通鑑之始八十六年矣梁惠王死梁襄王死哀王立矣是為秦

文惠君後稱惠王前十三年而二十一年更為元年之七年也

秦紀書七年樂池相秦韓趙魏燕齊楚匈奴共攻秦秦使庶長

疾與戰脩魚虜其將申差敗趙公子渴韓太子魚斬首八萬二

千以六國表攷之於秦書五國共擊秦不勝而退又書魏哀王

元年擊秦不勝韓宣惠王十五年擊秦不勝趙武靈王八年擊

秦不勝楚懷王槐十一年擊秦不勝燕會王三年擊秦不勝齊
湣王地六年不書此四字而秦紀有齊在其中紀不書楚皆刊
本之缺歟東萊謂此年蘇秦始為合從未幾解散至是再申前
約而攻秦則一年兩舉也攷蘇秦傳不得其說候檢戰國策攷
周慎靚王三年癸卯再見癸卯得一百二十年漢高祖之六
年也匈奴之名始見於慎靚王之癸卯六十二年甲辰而秦
亡周一百一十二年而漢滅秦高祖五年有天下七年而遇
匈奴之困匈奴之強恰二百二十年矣蘇秦合從如此其盛
而敗者東萊謂以楚懷王之昏弱為盟主蘇秦之反復而約
諸侯張儀又在魏陰為秦用安能有濟是也回謂春秋時魏
絳建和戎之策戎狄雜處中國至戰國時皆亡矣蘇秦何故

引匈奴之師驅馳中原而生其心耶所謂九國是時有周宋
魯衛中山代諸小國也

史記李牧傳見匈奴

史記廉頗藺相如列傳後附李牧傳而無有其目李牧者趙之
北邊良將也常居代鴈門備匈奴云選車得千三百乘騎萬
三千匹百金之士五萬人穀者十萬人破殺匈奴十餘萬騎滅
襜褕都其路談反胡名也破東胡降林胡單于奔走

紫陽方氏曰單于之名見此中國少馬蘇秦說云六國多者騎
萬匹耳而匈奴動千餘萬騎而北漢合為一家強矣哉

史記秦始皇本紀見匈奴

史記秦始皇本紀二十六年初并天下三十二年以適遣戍西

北斥逐匈奴自榆中

徐廣曰在金城

並河以東屬之陰山

徐廣曰在五原北

在以

為三十四縣城河上為塞又使蒙恬渡河取高闕陶山北假中

晉灼曰王莽傳云五原北假廢壤殖谷北假地名也索隱曰高闕山名北假地名近五原築亭障以逐戎人

徙謫實之初縣三十四年適治獄吏不直者築長城

史記世家趙武靈王初胡服騎射

匈奴列傳秦昭王始築長城拒胡

商鞅同時七年築長城二十四年武靈王立八年五國相王趙

獨否謂已曰君與秦武王昭王同時十九年謂樓緩曰今中山

在我腹心北有燕東有胡西有林胡樓煩秦韓之邊而無疆兵

之救曰吾欲胡服樓緩善之又曰雖驅世以笑我胡地中山吾

必有之於是遂胡服○紫陽方氏曰匈奴即胡也林胡樓煩亦

胡別種也蘇秦傳其說燕王謂北有林胡則匈奴是時未全有

北土武靈王即位八年六國合從與匈奴共伐秦不勝而退見

胡服騎射之輕剽故効之攷胡字之始史記匈奴列傳秦繆公

時皆稱戎其東有林胡東胡之戎秦昭王滅義渠有隴西北地

上郡築長城拒胡下文云戰國七三國邊於匈奴專胡名始此

圖書亡秦者胡

史記始皇紀三十二年燕人盧生入海還而以鬼神事因奏錄

圖書曰亡秦者胡也鄭玄曰胡胡亥秦二世名也秦見圖書不

知此為人名反備北胡三十二年西北斥逐匈奴詳見蒙恬傳

○紫陽方氏曰蒙恬傳秦已并天下使將三十萬衆北逐戎狄

戎也狄也夷也胡也通稱歆書又曰胡虜也圖書世以為讖不

知始於何時河出圖洛出書開八卦九疇文字垂萬世道之見於器者也區區興亡有物司之何也周卜世三十卜年八百龜鑽以火以其裂坼之文觀攷休咎然不知預為之書如漢文橫庚庚子為天王誰實攢造

史記漢書匈奴傳先後同異

史記匈奴列傳至天漢四年貳師將軍降匈奴止而漢書天漢四年但書貳師將軍李廣利因杆將軍公孫敖游擊將軍韓說強弩都尉路博德之出及書廣利與單于戰於吾水上連日敖與左賢王戰不利皆引還如貳師之降巫蠱之變子孟堅皆不書何也孟堅匈奴傳分上下上篇書至宣帝神爵四年下篇始呼韓邪單于至更始二年終子長贊簡短不滿於武帝之將相曰

彼已將率曰孔氏著春秋隱桓之間則章至定哀之際則微意可見矣孟堅贊貶駁董仲舒大甚匈奴自唐虞已上已有山戎獫狁而先及夏后氏之苗裔曰淳維其甚盛也以劉項相持而冒頓復象恬之所侵地鳴鏑之俗并為一家故也

匈奴單于名數

頭曼單于○不勝秦北徙十餘年象恬死諸侯畔秦與中國界於故塞自淳維至頭曼千餘歲

冒頓單于○鳴鏑弑父 滅東胡 五月大會龍城秋馬肥

大會蹕林圍高祖白登劉敬和親遺高后書易其所無

遺文帝書天所立匈奴大單于和親 死子稽粥立

老上稽粥單于○文帝復遣宗女為閼氏 中行說為患

十四年十四萬騎入蕭關再和親 天地所生日月所置
大單于

軍臣單于○老上子 景帝立吳楚反趙王遂合謀入邊破
復和親無大寇武帝立和親 馬邑人聶翁壹佯賣馬邑
十萬騎入武州塞漢伏兵三十萬馬邑傍單于覺去誅王
恢 衛霍屢出幕南無王遑然子長心薄此二人

伊穉斜單于○十三年死無可書

烏維單于○元鼎三年立 武帝始巡郡縣 勒十八萬騎

郭吉使留不遣亦不為寇立十年死

烏師廬單于○立號為兒單于 沒浞野侯破奴二萬騎

三歲死子少立季父烏維單于之弟

响黎湖單于○立太初三年 一歲死其弟立

且鞮侯單于○武帝詔高皇帝遺朕平城之憂太初四年也

漢天子我夫人行中郎將蘇武使 李陵降

狐鹿姑單于○且鞮侯長子 太始元年與弟相讓而立

母病 以言屠貳師祠社武帝崩 匈奴孕重墮續孕重

懷妊也墮落也續音讀敗也罷音疲罷極困也匈奴為漢

兵所苦如此故常款和親 死子少款立弟衛律與母顯

渠闕氏詐矯單于令立其子壺衍鞮單于始元二年

壺衍鞮單于○穿井築城治樓藏谷 歸蘇武馬宏希復犯

塞 單于擊烏桓趙充國言便 霍光從范明友言擊匈

奴既後乃擊烏桓破之匈奴恐宣帝立發五將軍與烏孫

五萬騎共二十餘萬伐之匈奴遂衰弱立十七年死

虛閭權渠单于○立弟也地節二年 將十萬騎出塞趙充國備之不敢入 神爵二年死

握衍拘鞮单于○立烏維单于耳孫也 日逐王與有隙降

漢立二歲暴虐殺伐國中不附姑息姑夕左地貴人共立稽侯狝為呼韓邪单于

呼韓邪单于○發龍地兵擊握衍朐鞮单于兵敗恚自殺神爵四年也

右漢書匈奴傳上參史記書一半凡十四单于高帝至宣帝之世而五单于爭立

屠耆单于○呼韓邪令右賢貴人殺右賢王遂共立日逐王

薄胥堂為屠耆单于發兵襲呼韓邪敗走之居单于庭呼

揭王讚右賢王欲自立屠耆殺右賢王

呼揭单于○以呼揭王自立

車黎单于○以右奧鞮王聞之即自立

烏籍单于○以烏籍都尉自立凡五单于

當是時屠耆单于強自將東擊車黎单于使都隆寄擊

烏籍单于車黎烏籍皆敗西北走與呼揭单于合兵烏籍呼揭皆去单于之號并力尊輔車黎单于於是僅有

三单于屠耆单于聞之四萬騎分屯東方備呼韓邪四

萬騎自將擊車黎車黎单于敗西北走屠耆留西關敦

地關音蹋明年呼韓邪单于西襲屠耆屠耆將六萬騎

擊呼韓邪戰敗屠耆單于自殺於是僅有二單于都隆寄與屠耆少子亡歸漢車黎單于亦降呼韓單于於是但存一呼韓邪單于李陵子復立烏籍都尉為單于呼韓邪捕斬之乃後單于庭蕭然衆絕數萬人

國振單于○屠耆單于從弟以休旬王自立在西邊

郅支骨都侯單于○以呼韓邪兄左賢王呼屠吳斯自立在東邊於是又有三單于後二年國振單于東擊郅支單于郅支與戰殺國振於是僅存兩單于郅支并國振兵進攻呼韓邪呼韓邪敗郅支都單于庭後四青都堅昆入康居其延壽陳湯斬之

伊利目單于○以屠耆單于小弟自立郅支單于欲西攻右

地道逢合戰郅支殺之

呼韓邪單于○甘露三年朝漢天子于甘泉宮有上渭橋稱萬歲之盛事元帝即位轉雲中五原穀二萬斛給焉郅支既誅竟寧死年復入朝元帝以後宮良家子王嬙字昭君賜單于呼韓邪請罷邊備願保塞上谷以至燉煌郎中侯應以為十不可王昭君號寄胡閼氏生一男伊屠智牙師為右日逐王呼韓邪立二十八年死建始二年也

復株紫若鞮單于○呼韓邪單于大閼氏之子雕莫陶渠也

復妻王昭君生二女河平四年入朝立十歲鴻嘉六年死搜諧若鞮單于○復株紫弟元延二年朝未入塞死車牙若鞮單于○搜諧弟立四歲綏和元年死

烏株留若鞮单于○車牙弟囊知牙斯也皆呼韓邪子也夏
侯藩說王根求張掖郡入漢地单于却之建平五年願
朝哀帝被疾郡臣謂可且勿許黃門郎楊雄上書諫元壽
二年來朝舊從者二百餘人今許五百餘人平帝初王莽
秉政不得二名風令改囊知牙斯為知莽篡更故印文匈
奴单于璽為新匈奴单于章分匈奴為十五单于招誘呼
韓邪单于諸子欲以次拜之右犁汗王咸咸子登助三人
至脅拜咸為孝单于助為順单于而匈奴不服矣咸亡歸
助死以登代為順单于莽後斬之烏珠留单于立二十一
歲死咸立

烏累若鞮单于○即咸也匈奴謂若鞮為孝見漢帝仁孝慕

之莽易匈奴為恭奴单于為善于咸立五歲天鳳五年死
呼都而尸道臯若鞮单于○烏株留单于子也莽不道又強
立匈奴當其名者為順单于欲出大兵以輔立之會漢
兵誅莽更始二年陳遵使匈奴更始敗絕書

紫陽方氏曰漢書匈奴傳下又有十二单于王莽所立非匈奴
正統漢以數十世之力服匈奴於外而以一元帝六王后敗於
其內莽篡而匈奴絕乃後光武中興事入後漢共二十六單于
而其有才者冒頓也老上也軍臣也且鞮侯也呼韓邪也烏珠
留若鞮囊知牙斯者也凡六主北漢之雄而或善於戰或智於
謀者也漢高祖失之於白登而能用劉敬和親之策呂后凶焚
敗滅家族而能屈已答不遜之書是時蕭曹張平勃有謀臣焉

景帝待匈奴無所聞七國之變匈奴兵在其間而不能逞漢有人焉一周亞夫是也武帝初用聶壹王恢之計已大繆矣所當者七單于惟軍臣單于覺馬邑之詐且鞮侯單于留蘇武降李陵才足當漢餘五主為衛霍所苦二人者庸將也而五人者亦庸君也武帝之失多矣惟文帝宣帝所以待匈奴無遺策和親征伐並用然文帝難而宣帝易文帝值其盛而宣帝當其衰也元成哀平坐享安靜之福主弱臣強內根已蠹呼韓邪藉宣帝以自完見元成哀三帝之不兢豈不心少之乎囊知牙斯亦豈不知王莽之不道漢方富強甚盛而匈奴衰弱不能振耳不然叛去而侮中國必矣大抵漢武有雄才而無賢相真將幸而所遇之敵皆且爾之匈奴也昭帝時霍光亦不才烏桓之師趙充

國之說事用范用友之言本無遠識雖挾振主之威終於滅宗者見不明也尚有餘論姑且走筆記之於斯

劉敬使匈奴謂不可擊

高帝至晉陽聞韓王信與匈奴共擊漢上大怒使人覘匈奴使者十輩來皆言匈奴可擊上使劉敬復往還報曰兩國相擊此宜矜夸見所長今臣往徒見羸瘠老弱此必欲見短伏竒兵以爭利不可擊也漢兵三十餘萬兵業已行上怒械繫敬廣武遂至平城圍帝白登七日然後解帝至廣武赦敬斬前使十輩言可擊者

紫陽方氏曰善乎劉敬之覘國也而前使十輩何其愚也項羽以勇困高帝高帝以智敗項羽今者高帝乃以勇輕冒頓冒頓

欲以智困高帝耶韓王信之反恐誅逃死引匈奴入寇恃其強也而不虞高帝之自將信不敗何待匈奴亦不虞高帝之卒至而冒頓之心乃恃高漢祖一着冒頓騎兵三十萬高帝步兵三十萬騎兵少冒頓誘至高帝乘其兵未盡集一舉而包之上策也幸而陳平秘計得行又以王黃失約冒頓聽闕氏之言解圍而去使其從劉敬之說焉得有此

斬前使十輩

沙隨程氏曰兵法遣間貴用上智以帝之明達少長兵間顧不足以及知匈奴之情雖劉敬獻忠反遭械繫然則向之所遣使十輩特知有所不及耳帝不度其才而遣之固已非矣又皆覆之極刑寬仁愛人之資獨蔽於此耶

出奇計馬邑下史記是漢書非

紫陽方氏曰漢書張良傳良從上擊代出奇計下馬邑史記世家作出奇計馬邑下蓋高帝擊韓王信張良亦在軍中出奇計於馬邑之下則不特陳平也孟堅誤會子長意改書為下馬邑殊不然

劉敬和親之策

劉敬對高帝冒頓殺父代立妻群母以力為威未可以仁義說也陛下誠能以適長公主妻之必慕以為闕氏生子必為太子代單于冒頓在固為子婿死則外孫為單于豈嘗聞外孫敢與大父抗禮者執兵可無戰以漸臣也呂后泣不能遣長公主取家人子名為長公主妻單于使劉敬往結和親約

紫陽方氏曰冒頓殺父而望其以子婿臣漢先儒雖不然劉敬之言然自此匈奴少入寇終漢之世和親征伐一起一伏賴以永久回謂古之立國必有敵兩國相當兩主兩相皆賢兩存之勢也主不敵相不敵一存一亡之勢也高帝高后文帝與冒頓老上軍臣單于對蕭曹張平勃之為將相足與匈奴為兩存之勢高帝能從劉敬之策恢白登報復之心高后能聽季布之言孫谷孤居之書豈非大臣有謀乎文帝宣帝君臣足當單于有餘武帝更七單于五不才故以庸將衛霍之徒陵轢之元成哀平似不足當呼韓邪單于而匈奴衰矣故來朝漢此天下之勢也中國之於外國不過和戰並用彼欲和與之和子女玉帛何足計數十萬騎入寇百萬女子玉帛為虜此不之痛乃彼之惜耶

彼來戰與之戰不窮追遠討寇之出境即細柳之屯有以待之也端平之事回所不曉史嵩之主和鄭清之主戰捐幣而和幣不足惜入境而戰戰不必出且和且戰曲不在我足矣月呂蔑思二十七人辛丑之書嵩之不答過矣遜辭謝之如呂后可也天所立大單于又有天地日月之號不可較也存國可也屈已何傷趙范趙葵全子才三京之師清之無識以誤國彼未嘗先犯我而以弱抗強以數世積累一朝棄之何也丙申以後蜀帥非人襄淮諸閩亦皆具才爾清之之罪又浮於嵩之矣是時江南士大夫有三字曰和曰戰曰守回謂且和且戰則可以戰為守則可既不能和又不能戰清野堅壁而謂之守亡之道也可戰何惜一戰能戰而後能守孤其城閉其門郊野闐乎無人

不設伏於險阻不乘夜以攻劫由江及淮蕩然坦塗其亡也久矣况以不讀書之賈似道輔成德之九五其何以當之哉

右平城事在七年冬十月受朝之後韓王信之變在六年秋九月事歆見首尾則不得不移後事於先也

古今攷卷之二十六終

